



Eleisaun Foun iha Timor-Leste tenke Livre no Justu

(Dili/Bankoke, 2 Maiu 2018) – Timor-Leste sei hala'o Eleisaun Parlamentár foun iha 12 Maiu 2018, fulan sia depoizde hala'o Eleisaun Parlamentár iha 2017, tanba laiha parte ida ne'ebé manán ho klaru iha votasaun tinan kotuk. Dezde Timor-Leste hetan nia independénsia, ida-ne'e primeira vés iha nesesidade atu foti medida hanesan ne'e. *The Asian Forum for Human Rights and Development* (FORUM-ASIA), hamutuk ho nia membru lokál sira, Programa Monitorizaun Sistema Judisiál (JSMP) no Asosiasaun ba Lei, Direitus Umanus no Justisa (HAK) husu partidu polítiku hotu-hotu atu garante katak eleisaun ne'e sei livre no justu hodi tane aas demokrasia iha Timor-Leste.

Ami rekoñese tensaun entre Governu nia koligasaun minoria no aliansa maioria parlamentár (AMP), ne'ebé hamosu impasse polítika ne'ebé eziste daudaun. Depoizde forma Governu minoria, ne'ebé hetan asentu 30 husi total 65 iha Parlamentu Nasionál, la konsege aprova programa nasional no orsamentu ne'ebé propoin tiha ona.

Iha 20 Novembru 2017 AMP hato'o mosaun sensura hasoru Governu. Nu'udar rezultadu, Prezidente Francisco Guterres decide atu dissolve Parlamentu, no organiza eleisaun foun. Ida-ne'e bazeia ba konseitu katak medida refere sei garante katak povu Timor-Leste sei sai na'in ba sira-nia futuru rasik.

Tanba situasaun nunka akontese antes iha Timor-Leste, ami preokupa kona-ba konsekuénsia ne'ebé bele mosu. Preokupasaun hirak-ne'e relasiona ho: Timor-Leste la la'o ba oin, tanba laiha programa nasional no mós laiha programa orsamentu aprovalu hodi administra Governu; possibilidade atu hetan problema seguransa relasiona ho xoke-malu entre partidu polítiku sira; no impaktu potensial husi situasaun perigu ida-ne'e ba direitus umanus no direitu síviku iha terrenu. Bainhira Governu la funsiona, labele fó atensaun ba grupu vulneravel sira-nia problema. Povu mós preokupa katak depoizde eleisaun foun ne'e, sei hetan situasaun ne'ebé hanesan, tanba partidu balu dala ruma sei la satisfás ho rezultadu.

Tanba ne'e, ami husu ba partidu polítiku hotu-hotu, *Provedoria dos Direitos Humanos e Justicia* (PDHJ) (nu'udar Timor-Leste nia Komisaun Nasionál ba Direitus Umanus), *Comissão Nacional de Eleições*, no sosiedade sívil iha rai laran hodi serbisu hamutuk no garante kampaña eleisaun ne'ebé respeitozu iha semana hirak oinmai no eleisaun ne'ebé livre no justu iha 12 Maiu 2018. Liuliu, ami husu partidu polítiku hotu-hotu respeita rezultadu no desizaun ne'ebé povu rasik hili, no husu sira serbisu hamutuk hodi garante estabilidade polítika iha rai laran. Tenke haluha interese polítika sira. Só bele tane aas prinsípiu kona-ba ema hotu-hotu nia partisipasaun bainhira rona no komprende malu, no bele kria unidade ba ema oioin iha Timor-Leste. Depoizde istória

turbulentu iha Timor-Leste, ita tenke tane aas prinsípiu kona-ba ema hotu-hotu nia partisipasaun, tuir saida mak povu hakarak.

Atu hetan informasaun tan, favór kontakta:

Rachel Arinii Judhistari
East Asia no ASEAN Programme Manager
Asian Forum for Human Rights and Development (FORUM-ASIA)
Jalan Kramat II No.7, Kwitang-Senen, Jakarta Pusat
10420 - Indonesia.
Tel. +62 21 391 9 006

Luis de Oliveira Sampaio (Diretór Ezekutivu JSMP)
Email: luis@jsmp.tl
(670) 77295795

Manuel Monteiro
Diretór Ezekutivu Asosiasaun Hak
manuel.maklerok@gmail.com
(670) 77227676